

# 1 Yon Yonro Nakaya Koretero Nakangoyingo

1 Yonro Mande Tabango

Yon ngu kuri dogoni yeingo, ngu naruno nguno, ene nga so uyikoreteroga, nga nakangoro, Esiya merako oni simoo bare nowoondoyemo hamoo teyingo, nguro soweyoyunoyingo. Ngu narungga ngu, Yon ene Epesas endemo nguno oruwo.

Yonro ingonduduni ngu eraya. Ingonduduni gura ngu, ene oni simoo bare Yisasro nowoondoyemo hamoo teyingo, nguro mande yanggango eyingo. Ene kuri nowoondoye hamoomonggo Anut inowonggoku ngu, gome ooreng. Ataga ngu, ene enengo oni nguro nowoondoyi ooreng tetenggo. Yonro ingonduduni gura ngu, etuyeroyingo oni godange, nguro ingonda teyi, ero eyingo. Ngu etuyeroyingo oni godange, ngundo ngandiro etenggo. Noorenko gowenani biyomi ooreng oorooteku, muringga nguno ngu, Yisas ene oni noore ngandiro, ma tunootewa. Ene ngu, noore ngandiro ngu, enengo goweyi ngu songo guradiro ooreng, ero eyingo. Ngu godange oni etuyeroyingo gidarega, ngundo ngu, ngandiro ingootenggo. Ingoyingo urungga yoweroyi ngu, hamoo oo koreteyingo, ero ingootenggo. Nowoondoyi teweroyi muringga ngu oo bodaga nangge, ero etenggo. Ene oo metemi nguro ma ingondudu tetenggo. Ngu oni gidarega

ngu, ene Krayisya mundiyi tetenggo. Ngu muringgano, nguno ngu, Yondo oni simoo bare nowoondoyemo hamoo teyingo, ngu hamoo mande nenengo oorengo ngu, ero etuyeroying. Nguno ngu, godange oni etuyeroying, nguro muriye biyomingga ngu yootunoro, tunoo oorendo etuyeroote.

Nga buk ngaro mande gumi gumi ingoweroyi, ngu ngandiro ooroote:

\* Hamoo ingondudu oorendo ngu, nga so uyingga ngano ooroote. 1:1-4.

\* Soru himi nguro mande murini, ko ooreri nguro mande murini, ngu ngandiro ero ingowanggo. 1:5-2:17.

\* Ene komo Krayisro mundi tetenggoku simoo bare, nguro ingonda teyi, ero mande eyingo. 2:18-29.

\* Nooreya eyingo, noore mete Anut nangoni ngu wirikoro, ko Setanro nangoni nguya wirikowato. 3:1-4:6.

\* Anutdo ngu nowoondoyi teweroyi muringga, nguro simburi oorendo. Ngu muringga ngu gome oorendo, nguro noore nguya ngundiro nangge, dobookurinanimboro nowoondoyi teyunoro, nguro ingowato. 4:7-5:5.

\* Oo kabusagobo mande eyingo, Yisas Krayis owoooyi bingami ero okooweroyi, ko suwoooyi sano sugi sugi keta oruweroyi, nguro mande. 5:6-21.

### *Suwoooyi Sano Keta Oruweroyi Nguro Mande*

<sup>1</sup> Nga Mandega Suwoooyi Sano Keta Oruweroyiga ngu, noorendo wesiyoro ero

etuyeroottetoku ngu. Nga oo nga kurimi oorengo oruwoku, ngu noore ingoro, doongenanimbo nguya kenoyingo. Noore kandenanimbo nguya doworo kenoyingo.\*

<sup>2</sup> Ngu Suwooyi Sano Oruweroyi Ketangga ngu, tunoo oorengo endesina tunootetoni, noorendo ngu kenoyingo. Ngundiro nguro, ngu Suwooyi Sano Keta Oruweroyiga, nguro mandeni, yeno wesiyoro, ero etuyeroottetu ngu. Ngu ene kurimi enengo eweyi Anut tanggeyimo oode, ngunonggo, ene nooreno tunootetoni, noorendo ene kenoyingo.

<sup>3</sup> Noorendo ene kenoro, mandeni nguya kuri ingoro, nguro noorebana, yeno nguya, nguro mandeni ero etuyeroottetu ngu. Nguno ngu, ye nguya enengo mandeni ngu ingoro, nooreno ombutoyiga, nooreya nowoondonani guranangge yewato. Ngunonggo, noorengoo bidodo nowoondonani guranangge Awananimo yero, ko, enengo Nangoni, Yisas Krayisya, gobooro oruwato.

<sup>4</sup> Noore mande nga nakangootetoku, nguro noorengoo oni oni tetetokungga, ngu gome oorengoo tunooteni.

### *Noore Komo Soru Himimo Oruwato*

<sup>5</sup> Anutro Nangoni, ngundo mande, nga etoni, ingoyingo. Nguro noorebana yeno ero etuyerootteto. Ngu ngandiro: Anut ngu soru himi oorengoo, hamoo oorengoo, Anutno ooreri bodaga kini.†

---

\* <sup>1:1:</sup> (Suwooyi Sano Keta Oruweroyi Mandega ngu, Yisasro ngundiro etc). † <sup>1:5:</sup> ( Anut enengo mandeni murini, ngu nenengo oorengoo ngu, soru himi ngundiro).

**6** Ene noorendo ngandiro ewato. Noore Anutya nowoondonani gobooro guranangge ero ngu, ko, noore suwoo ooreriko endeyowatoku ngu, arisa, noorengo mandega etetoku, ngu godange oorendo eteto. Yo, noore ngundiro ero ngu, asa, Anutro mandeni murini, hamoongga ngu nowoondonanimo, nguno ma ooroote.

**7** Ene, Anut, enengombo soru himi oorendo. Nguro ngu, noore enengo soru himimo endeyoro, ootooro ngu, asa, noore dobookurinanimboya nowoondonani gobooro guranangge siyero oruwato. Nguno ngu, Anutro Nangoni, Yisas, nguro sidu darowo, ngundo noorendo weti mbumbuwa bidodo sonowooro, andangewoku, ngunonggo noorendo nowoondonani gome metemi sarayi tunootete.

**8** Noore weti mbumbuwa kini, ero ewatoku ngu, asa, noorengombo noorendo nowoondonani ngu ganangoro, godange eyinooteto. Nguno ngu, hamoo mande ngu nowoondonanimo hamoo oorendo kini.

**9** Noorendo weti mbumbuwa teyingo ngu, suwoooyi sano, Anutno noorendo biyominani ngu yootunoro ewatoku ngu, asa, Anutdo newende hamoomonggo, noorendo weti mbumbuwa andangero yokoro, ene noore ma yoyokowa. Kini, Anutdo enengo muri gome nenengo, ngunonggo, nooreno muri oo biyomi ngu bidodo sonowooyunoro yoyeni, noore oni gome metemi oorendo tunootewato.

**10** Noore weti mbumbuwa ma teteto, ero ewatoku ngu, asa, noore Anutya godange oni, ero owoooyi biyomi ewato. Yo, ngundiro etooye ngu,

asa, enengo mandeni, noore nowoondonanimo hamoo ma ooroote.

## 2

### *Krayis Ngu Nooreng Hoorooweyeroing*

<sup>1</sup> Ye nenengo Kristen simoone, no nga mandaega, yengo nakangoyunootenoku nga ngu, ye weti mbumbuwa ma tewero, ero nakangooteno. Ene oni gura weti mbumbuwa tewaku ngu, nooreng hoorooweyeroing oni, ngu Awanani, Anut tanggeyimo, eneya gobooro oorooteri. Ngu oni gome nenengongga, ngu Yisas Krayis.

<sup>2</sup> Ngu Yisas Krayisngga, ngundo nooreng weti mbumbuwanani, nguro kowuri urungga kooroworo, wetinani andangeyingo. Yo, ene nooreng weti mbumbuwa ngu andangero, ko, mera bidodomo oni simoo barero weti mbumbuwaye nguya, ngu bidodo andangeyunoro hoorooweyeroing.

### *Oni Anut Hamoo Ingooteku Ngu, Ene Anutro Murini, Ngu Keyote*

<sup>3</sup> Ene noore Anutro mamana mande ngu keyowatoku ngu, asa, noorengombo Anutro murini, ngu gome ooreng ingowato.

<sup>4</sup> Ene oni gurado ewa, no Anutro gome ingooteno, ero, ene Anutro mamana mandeni ngu ma keyoro ngu, asa, ene godange oni. Ngundiro nguro, Anutro hamoo mande ngu, ene newendemo nguya kini.

<sup>5-6</sup> Ene oni gura Anutro mande ngu gome ingoro, keyoro ngu, asa, ene newende bidodo Anut inoro oorootekungga, ngu hamoo noore

ingooteto. Ndadiro nguro, noore enedodo Anut newendemo uro oorooteto. Ene oni gurado ewa, no Anutyia oorootero, ero ewaku ngu, asa, ene Yisas Krayiso gome nenengo endeyoyingo, ngundiro oorengó nenengo endeyowa.

<sup>7</sup> Ye Kristen dobookurine, nondo mamana mande nga keta, amana gura, yengo ma nakan-goro yunooteno. Kini, nga mamana mandega nga, ngu yendo kurimi oorengó nga mamana mandega nga yoro, kandangero ingoyingo.

<sup>8</sup> Ene nga mamana mandega, ataga nondo yengo nakangootenoku nga, ngu mamana mande keta gura. Noore ingooteto. Nga ngu, Yisas Krayis, enengo koni, ngundo nowoondonanimo ko tete. Ngundiro nguro, noore gome oorengó nowoondonanimonggo hamoo ingooteto. Nga mamana mande ketingga nga, ngu ene hamoo oorengó, ero ingooteto. Yo, Anutdo Setanro ooreri, yeni kinitewero tero, ngunonggo soru himi yeni, tunootewero tete.

<sup>9</sup> Ene oni gurado ewa. No soru himimo oorooteno, ero, ene dobooyi guraya sanggiri tero, boguwoowaku ngu, arisa, ene komo ooreriko uro ooroote.

<sup>10</sup> Ene oni dobooyi nowoondoyi teyinooteku ngu, ene Anutro soru himimo ooroote. Soru himimo endeyoro oode, ene mereno ma sorewa.

<sup>11</sup> Ene oni gura dobooyiboya newende biyomi ingoro, oorootekungga ngu, ene ooreriko ooroote. Yo, ooreri ngundo ene newende doobengootoni, nguno ene oore erewero, wenonoro ooroote. Ndadiro nguro, ooreri ngundo doongeyi kuri doobengoro yokoyingo.

**12** Ye noro simoone ngu, Anutdo Krayis owoooyimo, yengo weti mbumbuwaye kuri andangeyunoyingo. Ngundiro nguro, nondo nga mandega nga, yengo nakangoro yunooteno.

**13** Ye awa awaye, ye ngu oningga (Krayis), ngu kurimi oo ma tunooteyingomo oruwo. Ene oode omburo ataga, nguya oorooteku ngu, ye nguro murini ingootenggo. Ngundiro nguro, nondo nga mandega nga yengo nakangoro yunooteno.

Ye simoo oore, nondo nga mandega nga yengo nakangoro yunooteno. Ndadiro nguro, ye Setanro yanggangoni ngu, ye kuri dagawonggoku, nguro no mande nga nakangoro eteno.

**14** Ye simooye garo, nondo yengo nga mandega, nga nakangoro yunooteno. Ndadiro nguro, ye Awaro murini, gome oorenggo ingootenggo.

Ye awa garo, ye ngu oningga ngu kurimi oo ma tunooteyingomo oruwoku, omburo ataga, nguya oorooteku ngu, ye nguro murini ingootenggo. Ngundiro nguro, no nga mandega, nga yengo nakangooteno.

Ye simoo oore garo, ye yanggangoyedodo, Anutro mande ngu yengo nowoondoyemo nguno oorooteku, ngundo ye Setanro biyomini ngu, ye kuri dagayingo. Ngundiro nguro, no nga mandega, nga yengo nakangoro yunooteno.

**15** Ye mera ngaro muri biyomi gura gura oorooteku, nguro nowoondoyemo ma hahangero oruwero. Oni gura, ene mera ngaro murini biyomi, nguro hahangero oorooteku ngu, arisa, ene newendemonggo, Awaro nowoondoyi teweroyi muringga, ngu eneno kini.

**16** Noore ingooteto. Mera ngaro oni nguro muri bidodo ngu; goweye ngaro nowoondoye uru teweroyi; oo kenomayingoweroyi; enengo oo sitowi ngu kenoro, nguro oni oni teweroyi muri, ngu bidodo Awanonggo, ma ombute. Kini, ngu merako oni nganonggo tunootete.

**17** Mera ngano oo oorooteku, ngu meradodo kinitemukowa. Yo, hamoo, oniro nowoondoye uru teweroyi nguro murini, ko, doongeye gome teweroyi murini nguya kinitewa. Ene oni gura, Anutro manggowo keyoro oorooteku ngu, ene sugi sugi oruwa.

*Krayis Yisasro Mundi Oni Ngu Kuri Tunoote-wonggo*

**18** Ye nenengo Kristen simoone, nga narungga nga ngu, naru wenga namoko tete. Kuri, ye Krayisro mundi oni gura tunooteweroyi, nguro mande ingowonggo. Ene ataga, Krayisro mundi oni owooyingga oorengo oorootenggo. Nguro ngu, noore ingooteto. Naru wenga, ngu namoko tunootewero teteku nga, ero ingooteto.

**19** Yo, ngundiro oni ngu, noore kewooronan-imonggo, noore yoyokoro satenggo. Ndadiro nguro, ngundiro oni ngu, noorenge oni nenengo kini. Yo, hamoo, ngu oni ngu noorenge oni tetoyi ngu, ene suwooyi sano nooreya oruwato. Ene noore kuri yoyokoyingo, nguro noore ingooteto. Ngundiro oni ngu, bidodo noorenge oni kini, ero ingooteto.

**20** Ye kuri, Yuka Kundingiyi yoyingo, nguro ye bidodo enengo hamoo mandeni ngu ingootenggo.

**21** Ye bine, hamoo mande, ngu ma ingooteng-goku, no nga mandega, nga yengo nakangooteno? Kini, ye hamoo mande ngu kuri ingootenggo. Ene ye ingoyi! Hamoo mande ngu godange mande nguno tunooteweroyi ereremo kini. Ngundiro nguro, no nga mandega nga yengo nakan-goyunooteno.

**22** Oni oone, ngu godange oni? Ngu oni gidare-gado ngandiro etenggo. Yisas ngu ene Anutro simoo bare ko yoyoweroyi oni kini, ero etenggo. Ngundiro oni ngu, ene Krayisro mundi oni tero, Anut ko enengo Nangoni, Yisas nguya, kootu inootenggo.

**23** Oni gura ene Anutro Nangoni kootu inoro yokowaku ngu, ene eweyi Anut nguya kootu inoro yokowa. Ene oni gura ene Nangonimboro newendemo hamoo tewaku ngu, ene eweyim-boro nguya newendemo hamoo tero oruwa.

### *Yuka Kundingiyimbo Hamoo Mande Ngu Etuyeroote*

**24** Ye kuri mande ingoyingo. Ngu nowoon-doyemo, nguno gome dowootoyiga, sugi sugi ingonduduwooya oriyi. Ye mande kuri ingowong-goku, ngu sugi ingonduduyemo gome dowooro oruwanggoku ngu, arisa, Yisasdo, eweyi Anutyia ye soboyeroro, gome yodowootori, ye eneya oruwanggo.

**25** Krayisdo noorengو sunggi mande, ngandiro ero gosiyoingo. Ene sugi sugi keta oruweroyiga, ngu yunowero, Krayisdo ngundiro eyingo.

**26** Nondo nga mandega yengo nakangootenoku nga ngu, oni ye ganayeroro, ye yoyoro, muri

biyomimboro oore, ngu ye etuyeroottenggo ero, nguro nakangoro yunooteno. Nguro ngu, ye komo ingonda teyi!

<sup>27</sup> Krayisdo Yuka Kundingiyi ye yunootoni, yoyingo, ngu yeya oorootenggoku ngu. Ngundiro nguro, yengo ingonduduye ngu ma wenonootenggo. Kini, Yuka Kundingiyi, ngundo suwoooyi sano, oore oo gome ngu etuyerowa. Yuka Kundingiyi, nguro mandeni ngu hamoo mande oorengo, ngu godange kini. Ngundiro nguro, ye komo Krayisro nowoondoyemo hamoo yanggango tetoyiga, ngunonggo, Yuka Kundingiyimbo oo etuyeroottku nguya, ngundiya nangge keyoyi.

<sup>28</sup> Yo, ye noro Kristen simoone, ye komo Krayisya nangge oriyi. Ngundiro tero ngu, asa, ene kootuyisina, tunooteweroyi naruno, noore ene doongeyimo yanggango dikaro, oyimo ma yowato.

<sup>29</sup> Yendo ngandiro ingootenggo. Krayis, ngu oni gome nenengo oorengo, ero ingootenggoku ngu, arisa, ye ngandiya ingoyi. Oni ene muri gome nenengo oorengo ngu tero, ene Anutro simoongo.

### 3

#### *Ataga, Noore Anutro Simoongo Oruwato*

<sup>1</sup> Ye komo gome ingoyingo yoyi! Ndadiro nguro, Awanani Anutdo noorengo nowoondoyi oorengo tero, ene newende noore yunoyingo. Yo, Anutdo nooreya noro simoone, ero eyunoote. Hamoo oorengo, noore Anutro simoongo! Mera ngaro

oni ngundo Anutro ma ingootenggo. Ngundiro nguro, noorengu nguya ma ingootenggo.

<sup>2</sup> Ye Kristen dobookurine, ataga nga ngu, noore Anutro simoongo tero oorooteto. Ene kootuyisina, ndadiro oruwatoku, ngu ma tunooteyingo. Ene noore ingooteto. Kootuyisina, Krayis ko ombuteku naruno ngu, noore hamoo oorengu kenoro, noore ene ngundiro oorengu tunootewato, ero ingooteto.

<sup>3</sup> Oni bidodo, Krayisro doongetero, soboworo, doongedoongoodoongo tero oorootenggoku, ngu songo songomo nowoondoye gome oorengu yomosiyororootenggo. Krayis, enengombo gome oorengu oorooteku, ngundiro tero oruwanggo.

<sup>4</sup> Oni ene weti mbumbuwa tero endeyooteku ngu, ene Anutro mamana mande ngu tootoongoro, ma keyoote. Ndadiro nguro, weti mbumbuwa teweroyi muringga, ngundo Anutro mamana mande ngu tootoongoote.

<sup>5</sup> Ye ingootenggo. Krayis ngu oni simoo bare bidodoboro weti mbumbuwaye andangeyunowero tunooteyingo. Ene Krayis bungomo, weti mbumbuwani gura ma oriyingo, ero ingootenggo.

<sup>6</sup> Oni gura, newendemo Krayisro ingoro oorootekungga ngu, ene weti mbumbuwa murimo ma oruwa. Ene oni gura weti mbumbuwa, nguro murimo oruwaku ngu, asa, noore tunoo ingowato. Ngu oningga, ngu hamoo oorengu, Krayis ma kenoro ingoyingo, ero ingowato.

<sup>7</sup> Ye noro Kristen simoone, ye ingonda teyi! Kinitetoni ngu, oni gurado ye ganayerowanggo. Ye ingoyi, Krayis, ene oni gome nenengo oorengu.

Nguro ngu, oni ene muri gome nenengo teteku  
ngu, ene nguya oni gome nenengo.

<sup>8</sup> Kurimi oorengo, Setando weti mbumbuwa  
tero oruwoku, ngundiro nangge, omburo, ataga,  
nguya weti mbumbuwa tete. Ngundiro nangge,  
oni simoo bare weti mbumbuwa tewero, hahang-  
ero tetenggoku oni, ngu Setanromu. Ngundiro  
nguro, Anutro Nangoni, ngundo omburo, Setanro  
murini, koni biyomi ngu toongooro, yokowero  
omburo, tunooteyingo.

<sup>9</sup> Oni gura, ene Anutro Nangoni tero ngu,  
ene weti mbumbuwa muri biyomi ngu ma tero  
endeyoro oruwa. Ndadiro nguro, Anutro man-  
deni murini ngu ene newendemo oorooteku  
nguro. Ngundiro nguro, ene weti mbumbuwaro  
murimo ma oruwa. Ndadiro nguro, ene Anutro  
Nangoni oorengo.

<sup>10</sup> Ndawu oningga ngu, Anut simoongo, ero  
noore ingowero ngu, ko, ndawu oningga, ngu Se-  
tanro simoongo, ero ingowero ngu, arisa, noore  
ngandiro ingowato. Oni ene mande muri gome  
nenengo ngu ma keyootekungga ngu, ene Anu-  
tromu kini. Ngundiro nangge, oni ene dobooyi-  
boro ma nowoondoyi tetekungga ngu, ene Anutro  
oni nguya kini, ero ingowato.

*Oni Dobooyi Nowoondoyi Teyinoweroyi, Muri  
Oorengo*

<sup>11</sup> Kurimimonggo, ye mande ngandiro in-  
goyingo. Noore komo dobookurinanimbora  
nowoondoyi teyunowato.

<sup>12</sup> Noore Keyinro murini, ngundiro ma tewato.  
Ndadiro nguro, Keyin ngu ene Setanro oni tero

oode, nguro ene koneyo Ebel, ureni kumooyingo. Ndadiro tero nguro, ene koneyo ureyingo? Key-inro murini, ngu biyomi, koneyo Ebelro murini, ngu gome nenengo ooreng.

<sup>13</sup> Ye Kristen dobookurine, mera ngaro oni biyomimbo, yeya mundi tetoyiga ngu, arisa, ye nguro ma soriyokowero.

<sup>14</sup> Noore ingooteto. Noore dobookurinani, nowoondoyi teyunootetoku, nguro noore kumoo, nguro muri ngu kuri yokoro, noore ataga, keta oruweroyimo tunootero oorooteto, ero ingooteto. Oni ene dobooyiboro ma nowoondoyi tewaku ngu, ene kumoo, nguro murimo ooroote.

<sup>15</sup> Oni ene dobooyiboya sanggiri tero, newende biyomi yeteku, ngu ngandiro. Anut doongeyimo ngu, ene newendemonggo dobooyi ureni kuri kumoowo. Ye ngu ingootenggo. Oni, ene oni gura, ureni kumooawaku ngu, ene newendemo suwooyi sano keta oruweroyiga ngu Anutnonggo ombuteku, ngu eneno kini.

<sup>16</sup> Yisasdo enengo keta oruweroyiga ngu yokoro, noore hoorooweyeroyingo. Noore nguno ingooteto. Yisasdo, noorenge nowoondoyi tero kumooyingo, ngu nowoondoyi teweroyi muri, ngundo noore etuyeroote. Nguro ngu, noore nguya dobookurinani, hoorooweyerowero, meyero oode kumooawato.

<sup>17</sup> Oni gura ene mera ngaro oo moore, ene dobooyi gura kenootoni oo kinitetoni, nguro ene ma nowoondoyi tero, oo ngu gura ma inoro ngu, asa, noore kuri watayi. Anutro nowoondoyi teyingongga, ngu ene newendemo ma ooroote, ero ingowato.

<sup>18</sup> Ye, noro Kristen simoone, noore mandeno ko manggonanimbo nangge, dobookurinanimbor ma nowoondoyi tero ewato. Kini, noore komo nowoondonani hamoomonggo nguya nowoon-doyi teyunoro, ko gome tero hoorooweyerowato.

*Anutro Nowoondoyemo Hamoo Tero Ngu, Anutro Ma Sosorewanggo*

<sup>19</sup> Anutdo newende noore yunootoni, nguno noorendo enengo mandeni hamoo ooreng, ngu keyooteto. Ngundiro nguro, noore eneya nowoondonani gobooro yero, enengo imakeyingo murinimo oruwato.

<sup>20</sup> Ngundiro nangge, noore biyomi gura tetooye, nowoondonani ngundo nguro wirikoyerowaku ngu, asa, nooreng nowoondonani, ngu imakeyingomo oruwa. Ndadiro nguro, Anutro nowoondoyiningga, ngundo nooreng nowoondonaningga ngu dagate. Yo, hamoo, Anutdo ngu oo bidodo nowoondonanimo oorooteku, ngu ingomukoote.

<sup>21</sup> Ye Kristen dobookurine, ene nooreng nowoondonani, ngundo ma wirikoyerootoni ngu, arisa, noore Anut doongeyimo yanggango dikawato.

<sup>22</sup> Nguro noore oo guraro Anutno sumoo ero yemboongewatoku ngu, asa, ene oo ngu yunowa. Ndadiro nguro, noore enengo mamana mande ngu keyoro, ngunonggo ngu noorendo oo teweroyi Anutdo ingooteku, ngu teteto.

<sup>23</sup> Enengo mamana mande ngu ngandiro. Noore komo, enengo Nangoni Yisas Krayisro nowoondonanimo hamoo tero, ko, noore

komo oni dobookurinanimborο nowoondoyi teyunowato. Enengombo kuri ngundiro eyingo.

<sup>24</sup> Ene oni gura, Anutro mamana mande ngu keyowaku ngu, asa, ene Anutya gobooro oodori, Anutdo ngu oningga nguya, newendemo uro oo-rooteri. Anut enengo Yuka Kundingiyi, noore yunootoni, noore Yukani ngundo etuyerootoni, ingooteto. Anut noore nowoondonanimo oo-roote, ero ingooteto.

## 4

### *Anutro Yukani, Ko, Yuka Biyomi*

<sup>1</sup> Ye, noro Kristen dobookurine, mera nga bidodomο, ingondudu eyingo oni godange owoooyingga tunootero endeyootenggoku, nguro ngu, ye nguro mande nguro nowoondoyemo hamoo ma tewero. Ngu oni ngundo, yeno omburo ewanggo. Noore Anutnonggo Yuka Kundingiyi yunootoni, ngunonggo yeno eteto, ero ewanggo. Ene ye yuka bidodoboro nowoondoyemo hamoo ma tewero. Kini, ye komo yuka bidodo, towoyeroya kenoyi. Ene Anutnonggo, bine ombute, ngundi, kini bine.

<sup>2</sup> Ye mete Anutro Yuka Kundingiyi, ngu ngandiro ingowanggo. Oni bidodomonggo ewanggo, Yisas Krayis ngu kuri oni kirarongo tunooteyingo etenggoku oni ngu, Anutro Yuka Kundingiyingga, ngudodo oorootenggo.

<sup>3</sup> Ngundiro nangge, oni bidodo, Anutdo Yisas merako, ngano ma soweyoyingo, ero etenggoku

oni nguno, yuka gura eneno ooroote. Ene Anutromu kini. Ngundiro oni ngu, Krayisro mundini oni nguromu. Kuri, ye Krayisro mundi oni ombuwa, ero etoyi ingoyingo. Ene kuri omburo, ataga, merako ngano oorooteku nga.

<sup>4</sup> Ye noro Kristen simoone, ye ngu Anutromu, nguro yendo ngu ingondudu eyingo oni godange, ero etuyeroyingo ngu, ye kuri wongooyi uyingo. Ndadiro nguro, Yuka Kundingiyingga, ye nowoondoyemo oorooteku, nguro yangganganingga, ngundo Setanro yanggangoni merako ngano oorooteku, ngu kuri dagate.

<sup>5</sup> Ngu oni ngu, ene mera nogo ngaro oni. Ngundiro nguro, enengo mande biyomiye nguya, mera ngaromu nangge. Nguro ngu, mera ngaro oni biyomi, ngundo ngu, enengo mande biyomi etenggoku, ngu ingootenggo.

<sup>6</sup> Noore ngu Anutromu. Oni ene Anut ingootenggokungga, ngundo ngu, ene noorengو mande nguya ingootenggo. Ene Anutro oni kini ngu, ene noorengو mande nguya ma ingowanggo. Ngu sungigano nguno, noore ingooteto. Hamoo mandeboro yukani, ko, godange mandeboro yukani, ngu nenengo oorengو wirikoro ingowato.

### *Nowoondoyi Teyingo Muringga, Anutdo Nguro Simburi*

<sup>7</sup> Ye Kristen dobookurine, noore komo dobookurinanimboron woondoyi tewato. Ndadiro nguro, oni dobooyiboro nowoondoyi teyingo muringga, ngu Anutro murini oorengو. Oni ene nowoondoyi teweroyi muringga, ngu keyowaku

ngu, ene Anutro nangoni tero, ko, ene Anutro murini nguya, gome watayi tewa.

<sup>8</sup> Ene oni dobooyiboro ma nowoondoyi tewaku ngu, ene Anutro murini nguya, ma ingoote. Ndadiro nguro, Anut ngu ene nowoondoyi teyingo muringga, nguro simburi oorengo.

<sup>9</sup> Anutdo ngu noorengo nowoondoyi tero, enengo Nangoni guranangge yeni, ene merako ngano omburo, noore enengo ketangga, ngu yunowero ombuyingo. Noore nguno ingooteto. Hamoo oorengo, Anut ene noorendo nowoondoyi urungga oorengo teyingo, ero ingooteto.

<sup>10</sup> Noore koretero, Anutro nowoondoyi ma teyinoyingo. Kini, koretero Anutdo noorendo nowoondoyi teyunoyingo. Ndadiro nguro, Anut enengombo nangge, newende noore yunoro, enengo Nangoni yeni, merako ngano omburo, ngundo noorendo weti mbumbuwanani andan-gero yokowero ombuyingo.

<sup>11</sup> Ye Kristen dobookurine, ngu muringgano nguno, Anutdo noorendo nowoondoyi teyunoyingo ngu etuyeroote. Ngundiro nguro, noore nguya komo dobookurinanimboro nowoondoyi teyunowato.

<sup>12</sup> Oni gurado ene Anut kuri ma kenoyingo. Ene noore doboonani nowoondoyi teyunowatoku ngu, asa, Anut nooreya oruwa. Yo, Anutro nowoondoyi teyingongga ngu, noorenno gome nenengo enggedodo teroruwa.

<sup>13</sup> Anut enengombo, enengo Yuka Kundingiyi yunoyingongga, nguno noore ingooteto. Noore eneya oodooye, ene nguya noorenno oruwa, ero ingooteto.

**14** Noore enendo oo tewoku ngu kenoro, nguro mandeni wesiyoro ngandiro ero etuyeroooteto. Awando enengo Nangoni yeni, mera ngaro oni simoo bare bidodo, ko yoyowero ombuyingo.

**15** Oni gurado nguro mandeni ero ewa, Yisas ngu Anutro Nangoni, ero ewaku ngu, arisa, Anutdo ngu oningga, ngu newendemo uro, nguya oodori, ko Anutdo ngu oningga nguya, gobooro oorooteri.

**16** Ngundiro nguro, noore hamoo ingooteto. Anutdo noorengoo nowoondoyi teyingongga, ngu ingoro, noore nguro nowoondonanimo hamoo tewa. Anut ngu nowoondoyi teyingo muringga, nguro simburi oorengo. Oni ene nowoondoyi teyingo muringga, nguno oorootekungga ngu, asa, ngu oningga ngu, ene Anutya oodori, Anutdo ngu oningga nguya newendemo uro nguya oruwari.

**17** Nowoondoyi teyingo muringga ngu, noorenno gome nenengo oorengoo tunootewaku ngu, asa, noore mera ngano oorootetokuno, ngundiro muringga, yanggango urungga tunootero, nguno noore Krayis enengo kirarongo oorooteto. Ngundiro nguro, noore kootuyisina, wirikoyeroyingo naru urungga nguno ma sosorewato.

**18** Oni ene dobooyiboro nowoondoyi tero oorootekungga ngu, ene dobooyiboya ngu ma sosorewa. Kini, ene nowoondoyi teweroyi muringga, ngu gome oorengoo tetoni tunooteteku ngu, asa, ngundo sosoreweroyingga, ngu owero andangetoni toongewa. Sosoreyingo, nguro damoni ngu ngandiro. Oni ene weti mbumbuwani

tewoku, gumi biyomi yoweroyimboro ingondudu tero, nguro sosorete. Yo, hamoo, oni sosorettoyiga ngu, noore ingooteto. Nowoondoyi teweroyi muringga ngu, eneno gome nenengo oorengo ma tunootetoni, ooroote.

<sup>19</sup> Anutdo koretero oorengo, nooreng owoondoyi teyunootoni, nguro noorebana dobookurinanimboro, nguya nowoondoyi teyunowato.

<sup>20</sup> Ene oni gurado ewa, no nowoondone Anut inooteno, ero, ene dobooyiboya newende biyomi yewaku ngu, asa, ngu oningga, ngu ene godange ewo. Ndadiro nguro, oni gura ene dobooyi kenoro, nguro ene nowoondoyi ma teyinowaku ngu, asa, ene Anut ma kenoweroyingga, ngu nguya, newende inoweroyi, ngu ereremo kini.

<sup>21</sup> Nga mamana mandega nga ngu, noore Kray-isnonggo yoyingo, ngu ngandiro. Oni gura, ene newende Anut inoro ngu, asa, ene komo dobooyiboro nguya newende inoni.

## 5

*Anutro Nowoondoyemo Hamoo Teyingo,  
Ngundo Mera, Ngaro Yanggangoni Dagatenggo*

<sup>1</sup> Oni bidodo, Yisas, Anutro Nangoni, ene oni Anutdo noore ko yoyowero ero rogo teyingo, nguro nowoondoyemo hamoo tero, ene Anutro simoongo oorengo tero oorootenggo. Yo, hamoo, oni bidodo ngu, enengo nowoondoye ngu awaye ngu inoro, ngnonggo, enengo simoongo nguya nowoondoye yunootenggo.

<sup>2</sup> Ngundiro nangge, noore nowoondonani, Anut inoro, ngnonggo, noore enengo mamana mande

ngu keyoro ngu, asa, noore ngu muringga, nguno ingooteto. Noore Anutro simoongo, nguro nguya nowoondoyi teyunooteto.

<sup>3</sup> Ene noore Anutro mamana mandeni ngu keyowatoku ngu, arisa, noorenge nowoondonani ngu Anutinoro, nguro enengo mamana mandeni, ngu keyoweroyi, ngu kowuri kini.

<sup>4</sup> Oni bidodo Anutro simoongo tero ootooro, ene mera ngaro muri biyomi ngu andangero yokoyingo. Noore Anutro nowoondonanimo hamoo tetetoku muringga, ngunonggo, noore ebno yanggango tero, mera ngaro muri biyomi ngu dagateto.

<sup>5</sup> Onendo, ene ebno yanggango tero, ene mera ngaro muri biyomi ngu dagawo? Oni, ene Yisas ngu Anutro Nangoni, nguro newendemo hamoo tewokungga, ngundo ene mera ngaro yanggango, ngu dagawa.

<sup>6</sup> Yisas Krayis ene sono kundingiyi gimuweroyi, nguro murimo nguya omburo, ko, enengo sidudarowo de omukondinonggo wendootoni, nguya ombuyingo. Ene sonoro muri, ngunonggo nangge, ma ombute. Kini, ene sonoro murini, ko, sidudaroro murimo, nguya ombuyingo. Yuka Kundingiyi ngu, ene mande hamoo nangge eweroyi, nguro simburi. Yo, Yuka Kundingiyi, ngundo ngu Krayisro murini, wesiyoro ero noore etuyeroote.

<sup>7-8</sup> Ngundiro nguro, mande kabusa ngu bidodo Yisasro ero yootunoote. Ngu ngandiro: Yuka Kundingiyi, sono, sidudaro ngu oo kabusaga, ngundo Yisasro murini, nenengo tunoo etuye-roote.

**9** Onindo mande ero wesiyootoyi, noore ingooteto. Ene Anutdo mande, ero wesiyooteku, ngundo ngu, onindo mande etenggoku, ngu hamoo ooreng Dagayeroote. Anutdo nga mandega ewoku nga ngu, ene, enengo Nangonimboron mande eyingo.

**10** Oni, ene Anutro Nangoni, nguro newendemo hamoo teteku ngu, asa, ngu oningga ngu, ene Anutdo mandega wesiyoro ewokungga, ngu ene kuri newendemo ingowo. Ene, oni Anutro newendemo hamoo ma teyingo ngu, ene Anutro Nangoni, nguro mandeni hamoongga Anutdo eteku, nguro newendemo hamoo ma tete. Ngu muringga nguno, enengo newendemo hamoo, ngu andangero yokootoni, nguro ene Anutya ngandiro ewa, Anutdo godange, ero ete.

**11** Ngu hamoo mandega Anutdo ero wesiyooteku, ngu ngandiro. Anutdo ene kuri suwooyi sano keta oruweroyiga, ngu yunoyingo. Ngu ketangga, enengo Nangonimo oorooteku, ngu Anutdo noore yunoote.

**12** Oni, ene Anutro Nangoni, ngu woorogongoro ngu, ene ngu keta sugi sugi oruweroyiga ngu yowa. Ene oni Anutro Nangoni, nguno ma woorogongoro ngu, asa, ene ngu ketangga ngu ma yowa.

*Noore Ingooteto. Noore Suwooyi Sano Keta  
Oruweroyiga Ngudodo Oorooteto*

**13** Nondo nga mandega nga, yengo nakangoro yunooteno. Ndadiro nguro, ye Anutro Nangoni, nguro ingootoyiga, nowoondoyemo hamoo

tetoni, ye nguno hamoo ingootenggo. Ye ngu suwooyi sano keta oruweroyiga, ngu kuri yoyingo, ero ingootenggo.

<sup>14</sup> Nguro ngu, noore Anutro ingondudu ngu keyoro oode, ngunonggo noore oo guraro Anutno yemboongewatoku ngu, arisa, Anutdo noorenge yemboongengga ngu hamoo ingowa. Ngundiro nguro, noore Anutro ma sosorewato. Kini, noore mete Anut tanggeyimo oorowuwato.

<sup>15</sup> Nguno noore ingooteto. Ene noorenge kira eyingongga, ngu bidodo ene ingowa. Ngundiro nguro, noore ngu ingooteto. Noore eneno oo gura yunoni, ero yemboongewatoku ngu, asa, ene oo ngu noore yunootoni yowato, ero ingooteto.

<sup>16</sup> Oni gurado dobooyi gura ngu weti mbumbuwa tetoni, kenoro ngu, ene Anutno ngu oningga, hooroowero yemboongetoni, nguro Anutdo enengo mbumbuwani andangero yokoro, enengo keta oruweroyi ngu inowa. Ene oni ene weti mbumbuwa tewero hahangero oorooteku, oningga ngu, hooroowero yemboongeweroyimboro ma eteno. Ngundiro weti mbumbuwa, nguro oni kumooro, Setanro ende de nombo ma kumooweroyimo, nguno uwero teteku, nguro yemboongeyi, ero ma eteno.

<sup>17</sup> Muri bidodo nenengo kini, ngu muri, ngu bidodo weti mbumbuwa. Ene weti mbumbuwa gidarega, ngundo oni yoyeni, Setanro ende de nombono ma uwanggo.

<sup>18</sup> Noore ingooteto. Oni bidodo, Anutro simoongo tero oorootenggoku ngu, ene weti mbumbuwaro murini, ngu ma keyoro oorootenggo. Ndadiro nguro, Anutro Nangoni

enengombo enengo simoongo gome soboyerote. Ngundiro nguro, Setando kandeyi, ngu onino nguno yero ma yodowoowa, ero ingooteto.

<sup>19</sup> Noore ingooteto. Noore ngu Anutro simoongo oorooteto. Ene oni mera bidodomo ngu, Setando nguro tabango tero ooroote, ero ingooteto.

<sup>20</sup> Yo, hamoo, noore tunoo ingooteto. Anutro Nangoni, ngu kuri ombuyingongga ngu, ene noore ingondudu gomemu yunoweroyimboro ombuyingo. Ngunonggo ngu, noore ngu Anutga, ngu hamoo oorengo gome watayi. Noore Anut hamoongga nguya, enengo Nangoni Yisas Krayis, nguya goboro oorooteto. Hamoo oorengo, ene Anut oorengo, ene keta sugi sugi oruweroyi, nguro simburi.

<sup>21</sup> Arisa, ye nenengo Kristen simoone, ye komo godange anut nguro yengombo, yengo gome soboyeroyi! Ngu hamoo oorengo, ero eteno.

**ANUTRO MANDE KETA  
The New Testament in the Rawa Dialect of the Rawa  
Language of Papua New Guinea  
Nupela Testamen long tokples Rawa long Niugini**

copyright © 1992 Wycliffe Bible Translators, Inc.

Language: Rawa (Rawa) (Rawa)

Dialect: Rawa

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-09-22

---

PDF generated using Haiola and XeLaTeX on 18 Apr 2025 from source files dated 31 Aug 2023

7f5bc84a-4dea-522b-980c-a11c545b87cc